



10 November 2014
10 November 2014
P.U. (A) 296

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN SURUHANJAYA KOPERASI MALAYSIA (AKAUN DEPOSIT KOPERASI) 2014

MALAYSIA CO-OPERATIVE SOCIETIES COMMISSION (CO-OPERATIVE DEPOSIT ACCOUNT) REGULATIONS 2014



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA SURUHANJAYA KOPERASI MALAYSIA 2007

PERATURAN-PERATURAN SURUHANJAYA KOPERASI MALAYSIA
(AKAUN DEPOSIT KOPERASI) 2014

SUSUNAN PERATURAN

Peraturan

1. Nama
2. Tafsiran
3. Akaun Deposit
4. Maksud Akaun Deposit
5. Kehendak untuk mendeposit ke dalam Akaun Deposit
6. Pulangan bagi deposit
7. Pengeluaran deposit
8. Pembiayaan Islam atau kemudahan kredit
9. Pembayaran daripada Akaun Deposit
10. Jawatankuasa Akaun Deposit Koperasi
11. Fungsi Jawatankuasa
12. Mesyuarat Jawatankuasa

AKTA SURUHANJAYA KOPERASI MALAYSIA 2007

PERATURAN-PERATURAN SURUHANJAYA KOPERASI MALAYSIA
(AKAUN DEPOSIT KOPERASI) 2014

PADA menjalankan kuasa yang diberikan oleh subseksyen 43(2) Akta Suruhanjaya Koperasi Malaysia 2007 [*Akta 665*], Suruhanjaya, dengan kelulusan bertulis Menteri terlebih dahulu, membuat peraturan-peraturan yang berikut:

Nama

1. (1) Peraturan-peraturan ini bolehlah dinamakan **Peraturan-Peraturan Suruhanjaya Koperasi Malaysia (Akaun Deposit Koperasi) 2014**.

Tafsiran

2. Dalam Peraturan-Peraturan ini—

“Akaun Deposit” ertinya Akaun Deposit Koperasi yang disebut dalam seksyen 43 Akta;

“Jawatankuasa” ertinya Jawatankuasa Akaun Deposit Koperasi yang ditubuhkan di bawah peraturan 10;

“Kumpulan Wang Rizab Statutori” ertinya Kumpulan Wang Rizab yang disebut dalam subseksyen 57(1) Akta Koperasi 1993 [*Akta 502*] yang disenggarakan oleh sesuatu koperasi;

“wang lebihan” ertinya wang yang melebihi amaun yang diperlukan oleh sesuatu koperasi bagi kegunaan segera sebagai modal kerja bagi perniagaannya, yang boleh didepositkan atau dilaburkan di luar koperasi itu tanpa menjejaskan pengendalian perniagaan itu.

Akaun Deposit

3. (1) Akaun Deposit hendaklah terdiri daripada—
- (a) wang lebihan;
 - (b) Kumpulan Wang Rizab Statutori;
 - (c) pendapatan daripada pelaburan wang di dalam Akaun Deposit yang diperoleh daripada sumber yang disebut dalam perenggan (a) dan (b); dan
 - (d) kumpulan wang yang dijana oleh Suruhanjaya menurut seksyen 35 Akta.

Maksud Akaun Deposit

4. Akaun Deposit hendaklah digunakan bagi maksud—
- (a) memberikan pembiayaan Islam atau kemudahan kredit kepada mana-mana koperasi bagi pembangunan aktiviti dan perniagaannya; dan
 - (b) membayar apa-apa perbelanjaan berkenaan dengan pentadbiran Akaun Deposit.

Kehendak untuk mendeposit ke dalam Akaun Deposit

5. (1) Suatu koperasi hendaklah mendepositkan wang lebihannya ke dalam Akaun Deposit dalam tempoh yang ditentukan oleh Suruhanjaya.
- (2) Suatu koperasi hendaklah mendepositkan Kumpulan Wang Rizab Statutori ke dalam Akaun Deposit dalam tempoh enam bulan selepas tahun kewangan koperasi itu berakhir.

(3) Wang lebihan dan Kumpulan Wang Rizab Statutori yang disebut dalam subperaturan (1) dan (2), masing-masing hendaklah didepositkan mengikut apa-apa cara yang ditentukan oleh Suruhanjaya.

Pulangan bagi deposit

6. Suruhanjaya boleh menentukan kadar pulangan deposit yang disimpan dalam Akaun Deposit dari semasa ke semasa.

Pengeluaran deposit

7. (1) Sesuatu koperasi yang telah mendepositkan wang lebihan atau Kumpulan Wang Rizab Statutori ke dalam Akaun Deposit di bawah peraturan 5 boleh memohon kepada Suruhanjaya bagi pengeluaran wang lebihan atau Kumpulan Wang Rizab Statutori itu, dan pulangannya mengikut apa-apa cara yang ditentukan oleh Suruhanjaya.

(2) Suruhanjaya boleh mengenakan apa-apa syarat bagi pengeluaran di bawah subperaturan (1) sebagaimana yang difikirkan patut oleh Suruhanjaya.

(3) Apabila permohonan bagi pengeluaran di bawah subperaturan (1) diterima dan berpuas hati bahawa syarat yang disebut dalam subperaturan (2), jika ada, telah dipenuhi, Suruhanjaya boleh meluluskan pengeluaran itu.

Pembiayaan Islam atau kemudahan kredit

8. (1) Sesuatu koperasi boleh memohon kepada Suruhanjaya bagi apa-apa pembiayaan Islam atau kemudahan kredit daripada Akaun Deposit bagi pembangunan aktiviti dan perniagaannya.

(2) Tatacara permohonan dan fi pemprosesan bagi pembiayaan Islam atau kemudahan kredit, dan amaun, kadar caj perkhidmatan, kaedah dan tempoh bayaran balik pembiayaan Islam atau kemudahan kredit itu hendaklah sebagaimana yang ditentukan oleh Suruhanjaya.